

泰和縣志卷十九

吉安府泰和縣知縣高陽冉棠重輯

人物志四

列傳

明

楊士竒

子昱 孫穉

尹昌隆

子灝

郭餘

歐陽源

陳仲述

子賞

王復元

梁潛

梁混

子栗

泰和縣志

卷十九

人物 列傳 一

龍說

梁

棨

宋琮

姚與成

附曾克偉

從子 瀚

劉祿

蕭用道

楊相

王直

子仁 積 孫積 子翥

陳一敬

余學夔

蕭省身

歐陽和

陳循

尹崇高

陳禮

曾鶴齡

兄 齡

歐陽哲

陳士啟

劉咸

父 彝

廖謨

尹子源

劉綱

陳永

彭詡

陳孟潔

歐陽賢

明

楊士竒 □ 寓以字行早孤隨母適羅氏已而復宗 □ □

力學授徒自給建文初修太祖實錄用薦入翰林充  
編纂官尋授吳王府審理副仍供館職永樂初改編  
修簡入內閣典機務累陞諭德士竒奉職甚謹私居  
不言公事雖至親厚不得聞在帝前舉止恭慎善應  
對言事輒中人有小過嘗為掩覆之六年帝北巡命  
與蹇義黃淮留輔太子太子喜文辭贊善王汝玉以  
詩法進士竒曰殿下當留意六經暇則觀兩漢詔令  
詩小技不足為也太子稱善初帝起兵時漢王數力  
戰有功帝許以事成立為太子既而不得立怨望帝

泰和縣志

卷十九

人物

列傳

二

又憐趙王年少寵異之由是兩王合而間太子帝頗  
心動九年還南京召士竒問監國狀士竒以孝敬對  
十一年正旦日食禮部尚書呂震請勿罷朝賀侍郎  
儀智持不可士竒亦引宋仁宗事力言之遂罷賀尋  
進翰林學士改左春坊大學士仁宗即位擢禮部侍  
郎兼華蓋殿大學士帝御便殿蹇義夏原吉奏事未  
退帝望見士竒謂二人曰新華蓋學士來必有讜言  
試共聽之士竒入言恩詔減歲供甫下二日惜薪司  
傳旨徵棗八十萬斤與前詔戾帝立命減其半進少

保與同官楊榮金幼孜並賜繩愆糾謬銀章得密封  
言事進少傅兼兵部尚書時大理少卿弋謙以言事  
得罪士竒曰謙應詔陳言若加之罪則羣臣自此結  
舌矣帝立進謙副都御史而下勅引過時有上書頌  
太平者士竒獨曰陛下雖澤被天下然流徙尚未歸  
瘡痍尚未復民尚艱食更休息數年庶幾太平可期  
帝曰然因顧蹇義等曰朕待卿等以至誠望匡弼惟  
士竒曾五上書卿等皆無一言豈果朝無闕政天下  
太平耶諸臣慙謝是年賜璽書剝楊貞一印賜之宣

泰和縣志

卷十九

人物

列傳

三

德元年漢王高煦反帝親征平之師還次獻縣之單  
家橋侍郎陳山迎謁言漢趙二王實同心請乘勢襲  
彰德執趙王士竒曰事當有實天地鬼神可欺乎太  
宗皇帝三子今上惟兩叔父有罪者不可赦其無罪  
者宜厚待之疑則防之使無虞而已何遽加兵傷皇  
祖在天意乎帝初無罪趙意移兵事得寢時交趾數  
叛屢發大軍征討皆敗沒黎利遣人偽請立陳氏後  
士竒力言陛下恤民命以綏荒服不為無名漢棄珠  
厓前史以為美談不為示弱許之便於是棄交趾罷

兵歲省軍興鉅萬尋敕鴻臚寺士竒老有疾趨朝或後母論奏帝以四方屢水旱召士竒議下詔寬恤免災傷租稅及官馬虧額者士竒因請並蠲逋賦薪芻錢減官田額理冤滯汰工役以廣德意踰一年帝謂士竒曰恤民詔下已久今更有可恤者乎士竒曰前詔減官田租戶部徵如故帝怫然曰今首行之廢格者論如法士竒復請撫逃民察墨吏舉文學武勇之士令極刑家子孫皆得仕進又請廷臣三品以上及二司官各舉所知備方面郡守選皆報可英宗即位

泰和縣志

卷十九

人物

列傳

四

士竒首請練士卒嚴邊防設南京叅贊機務大臣分遣文武鎮撫江西湖廣河南山東罷偵事校尉又請以次蠲租稅慎刑獄嚴覈百司皆允行進少師乞致仕不允敕歸省墓未幾還初正統初士竒言瓦剌漸強將為邊患而邊軍缺馬恐不能禦請於附近大僕寺關領西番貢馬亦悉給之士竒歿未幾也先果入寇有土木之難識者思其言又雅善知人好推轂寒士所薦達有初未識面者而于謙周忱况鍾之屬皆用士竒薦居官至一二十年廉能冠天下為世名臣

九年卒年八十贈太師諡文貞次子穉以廕補尚寶丞成化中進太常少卿掌司事明史

按通志正統時內閣稱三楊以居第目士竒曰西楊楊榮曰東楊而溥嘗自書郡名曰南郡因目為南楊又萬歷志稱士竒貴極人臣隱約一似儒生其操持正直莫不敬憚及至取士論人率多平恕常語人曰天下萬世之事當以天下萬世之心處之次子穉以廕為尚寶司丞仕終南京太常寺卿長孫昱太僕寺丞所著有沙羨稿石臺藁文籍志

泰和縣志

卷十九 人物 列傳 五

法書志東里集三朝聖諭錄祀鄉賢 國朝雍正二年奉

旨崇祀歷代帝王廟配享春秋並給帑修祠墓又康熙志士竒名寓作遇疑誤

尹昌隆字彥謙灌塘人洪武三十年進士第二人授編修改監察御史建文初位視朝晏昌隆疏諫曰高皇帝雞鳴而起昧爽而朝未日出而臨百官故能庶績咸熙天下乂安陛下嗣守大業宜追繩祖武兢兢業業憂勤萬幾今乃即於晏安日上□刻猶未□□□

臣宿衛疲於伺候曠職廢業上下懈弛播之天下□  
之四裔非社稷福也帝曰昌隆言切直禮部其宣□  
天下使知朕過未幾以地震上言謫福寧知縣燕兵  
既逼昌隆以北來奏章動引周公輔成王為詞勸帝  
罷兵許王入朝設蹉跌便舉位讓之若沉吟不斷進  
退失據將求為黔徒布衣且不可得成祖入京師昌  
隆名在奸臣中以前奏貸死命傅世子於北平永樂  
二年冊世子為皇太子擢昌隆左春坊左中允隨事  
匡諫太子甚重之解縉之黜同日改昌隆禮部主事

泰和縣志

卷十九

人物

列傳

六

尚書呂震方用事性刻伎當其獨處精思以手指刮  
眉尾則必有密謀深計官屬相戒無敢白事者昌隆  
前白事震怒不應移時又白之震愈怒拂衣起昌隆  
退白太子取令旨行之震大怒奏昌隆假託官僚陰  
欲樹結潛蓄無君心逮下獄尋遇赦復官父憂起復  
謁震震溫言接之入理前奏復下錦衣衛獄籍其家  
帝凡巡幸下詔獄者率輿以從謂之隨駕重囚昌隆  
與焉後數年谷王謀反事發以王前奏昌隆為長史  
坐以同謀詔公卿雜問昌隆辨不已震折之獄具置

□刑死夷其族後震病且死號呼尹相言見昌隆守  
欲殺之云

史明

按萬歷志昌隆為御史時巡按閩中劾貪吏理冤  
獄風紀肅然還朝上疏四事節民力謹嗜慾勤政  
治務正學不報既而京師地震又上疏言陰盛陽  
微奸臣專政所致廷臣憾之黜知福寧縣坐中使  
誣呪咀下獄永樂初改北平按察知事時皇嗣未  
立武臣有言漢王有扈從功者上猶豫驛召昌隆  
至叩首曰長嫡承統萬世常經由是仁宗得為皇

泰和縣志

卷十九

人物

列傳

七

太子進昌隆中允竟因漢王讒黜為禮部主事及  
谷王謀逆事覺震陰令女習昌隆字雜獄詞中誣  
昌隆與同謀坐棄市後震死仁宗聞之曰是曾殺  
朕師者訪昌隆子得灝命大學士楊士奇字之賜  
御馬遣歸於是冤狀得暴

郭餘字慶宜洪武間徵論道之士應詔授廣東按察僉  
事有禹貢傳註詳節行於世

林志

歐陽源字允清蜀江人明初應聘為涑水訓導革除閒

嘗上言大計不報追論謫戍興州

萬歷志

陳仲述名繼先以字行登洪武進士授監察御史篤志  
潔修居官十年一布被猶書生時故物時進士名能  
古文者皆推仲述為第一懿文太子稱之曰陳古文  
既卒無產業其子賞力學無資鄉人易之表兄梁本  
之混旦夕督勵得舉於鄉亦登第官廣西按察司僉  
事其清苦一如仲述卒益貧甚無以庇妻子部使者  
黃翰至泰和感夢為之復其故居

萬歷志

王復元字子復灘江人洪武丙子選江西鄉試後四年  
試禮部授化州學正績最陞北監博士剗削鋒銳務

泰和縣志

卷十九

人物

列傳

八

為和易預修五經性理大全諸書書成受厚賜以風  
疾不起卒於官為人儉約質率無崖岸嗜為文章所  
著文集若干卷藏於家弟敬先率直闔爽惇義薄利  
初為宜章訓導陞岳池教諭化導誘掖所至政績懋

著卒於蜀

楊東里集

梁潛榜姓鍾字用之蘭子舉洪武丙子科鄉試授四川  
蒼溪訓導以薦除知四會縣改陽江陽春皆以廉平  
稱永樂元年召修太祖實錄書成擢修撰尋兼右春  
坊右贊善代鄭賜總裁永樂大典帝幸北京屢驛召

赴行在十五年復幸北京太子監國帝親擇侍從口翰林獨楊士奇以潛副之有陳千戶者擅取民財令旨謫交趾數日後念其有功貸還或讒於帝曰上所謫罪人皇太子曲宥之矣帝怒誅陳千戶事連潛及司諫周冕逮至行在親詰之潛等具以實對帝謂楊榮呂震曰事豈得由潛然卒無人為白者俱繫獄或毀冕放恣遂并潛誅

明史

按潛所著有泊菴集王文端直為序稱其少從王子啟受詩經又從陳仲述學古文侍仁宗在東宮

泰和縣志

卷十九

人物

列傳

九

監國時所言皆本於仁義他非所及仁宗嘗賜詩以寵之又稱其入翰林為修撰陞侍讀兼春坊贊善本傳脫去陞侍讀附此備考

梁混字本之潛弟天性至孝幼嗜學日夜研鑽傳註遂貫通經史歷瑞州溧陽兩學官陞蜀府紀善改魯府卒於官所著有坦菴集子栗字叔莊官國子學錄有

文名

宏治志

龍說字子與武溪人從劉雲章受易善講太極圖學者洒然忘倦為文章以理為主操行端潔雲章沒心喪

三年龍泉儒學聘為訓導師道尊嚴生徒敬服宏治志

梁棻字叔車潛子正統元年由進士為刑部主事善辨  
冤獄用薦擢廣西副使進布政使將士多殺良民報  
功棻諭其帥生致難民一人准功一級全活無筭田  
州土官岑鑑兄弟相讐棻為解之却其厚餽撫服梗  
化女土官民夷服其信義終浙江布政使明史

按宏治志載棻官廣西布政習知夷性獷戾不可  
繩以法往往簡節踈目撫之夷大悅服未幾以才  
堪治劇薦浙江左布政使操守益堅持行益謹天

泰和縣志

卷十九

人物 列傳 十

順中入覲恩賚甚隆清操粹行為時稱最滿九載  
卒於官著有松軒集又宏治志載棻弟楫字叔濟  
歷官太平知縣晚年家居著述甚富

宋琮字萬鍾洪武末舉鄉試第二明年會試第一與尹  
昌隆同登第授御史以忤權貴出知永福縣都御史  
奏留之復職尋以誣繫獄得白罷歸續由薦舉除海  
門訓導九年滿考陞刑科給事中差撫荊州歸省左  
遷詹事府錄事留春坊點書陞翰林檢討致仕萬曆志

按通志載琮洪武三十年會試第一北士無預者

琮善易學悵然語人曰翰苑當有厄吾其竄乎既而諸生言劉三吾白信蹈等南人私其鄉帝怒命侍講張信等覆閱不稱旨有言信等故以陋卷呈由三吾等囑之也帝益怒信蹈等論死三吾以老試邊琮亦遣戍帝親策問更試擢六十一人皆北士時謂之南北榜又曰春夏榜云永樂初赦還起刑部檢校鄉人楊士奇輩貴顯琮無所攀援宣德中以檢討掌助教事卒之前預刻死期或叩之以休咎輒不應

泰和縣志

卷十九

人物

列傳

十一

姚與成與曾克偉同居秀溪之上世為北隣與成七歲時鄉長者曾命對曰階前文武花初發即應聲云山  
上君臣藥已生聞者駭賞年十九與克偉同舉於鄉  
明年又登第與成授戶部主事出按直隸諸郡有廉  
能聲歸奏對稱旨賜圖書宴賚特厚卒年二十七克  
偉任御史按湖廣福建山東浙江遼東等處風聲焯  
焯以事謫戍用薦復起為刑部員外郎丁憂奪情起  
復授龍州同知歲餘援例歸朝未行而卒

萬歷志

按宏治志與成從子瀚字思寬博學多才歷官雲

南按察經歷著有鶴巢詩文集

劉祿字子敏劉家岡人父辰孫雅尚林泉不樂仕進祿其第三子也洪武末為山東道御史有能名以言事忤權貴黜為侯官令又言事降侯官典史益修其職嘗自署曰祿薄儉常足官卑廉自高永樂初徵拜河南道御史尋陞山東按察副使改湖廣廣東以疾辭

歸萬歷志

蕭用道岐子建文中舉懷才抱德詣闕試文章擢靖江王長史召入翰林修類要燕師渡淮與周是修同上

泰和縣志

卷十九

人物

列傳

十二

書指斥用事者永樂初預修太祖實錄改右長史從王之藩桂林作端禮體仁遵義廣智四門箴以獻後以疾乞歸卒於家通志

按楊東里集用道初名遵字用道後以字行遂別字坦行吉安知府朱仲智舉送京師試文章擢靖江府直史授承直郎永樂初陞右長史授奉議大夫從王之國桂林通志所載用道前後官次疑誤楊相字之宜景行元孫幼端靜不好兒弄其父思貽督教之十五以易經舉省試明年會試中副榜當授教

官思貽奏臣之子年與學皆未可為人師幸□臣以歸教之庶他日不辱任使從之永樂二年會試天下貢士相名在第一廷試二甲第一選為翰林庶吉士時太宗銳意文學擇曾榮等二十八人讀書禁中賜第給膳十年授刑部主事勤職不怠為人篤於孝友審於擇友有易義并文集藏於家宏治志王直字行儉伯貞子幼端重家貧力學舉永樂二年進士改庶吉士與曾榮王英等二十八人同讀書文淵閣帝善其文召入內閣俾屬草尋授修撰歷事仁宗

泰和縣志

卷十九

人物

列傳

十三

宣宗累遷少詹事兼侍讀學士正統三年宣宗實錄成進禮部侍郎學士如故五年出涖部事尚書胡濙悉以部政付之直處之若素習者八年代郭璫為吏部尚書帝將親征也先直率廷臣力諫不從命直留守王師覆於土木郕王攝政已即真時變起倉卒朝臣議屢上皆直為首而直自以不如于謙每事推丁之雍容鎮率而已景泰元年也先使使議和且請還上皇下禮部議未決直率羣臣請遣使往報因察其誠偽而撫納之奉太上皇以歸少慰祖宗之心陛下

天位已定太上皇還不復涖天下事陛下第崇奉之則天倫厚而天眷益隆誠古今盛事已而瓦剌別部阿剌使復至胡濙等復以為言帝召諸大臣及言官諭以宜絕狀直對曰必遣使毋貽後悔太監興安出呼曰若等固欲遣使有文天祥富弼其人乎直大言曰廷臣為天子使既食其祿敢辭難乎言之再聲色愈厲安語塞乃議遣使命李實羅綺往既行而瓦剌可汗脫脫不花及也先使先後至直等固請乃遣楊善等報之北實還又以也先使至具言也先欲和狀

泰和縣志

卷十九

人物

列傳

十四

直與寧陽侯陳懋等上疏請更遣使齎禮幣往迎上皇復上言今北使已發願本上皇之心順臣民之願因彼悔心遣使往報以圖迎復此不待計而決者也不然衆志難犯違天不祥彼將執為兵端邊事益棘京師亦不得高枕卧矣帝乃命羣臣擇使直與陳懋等請仍遣實後善竟奉上皇還二年也先遣使入貢且請答使直屢疏言邊備未修芻糧未積瘡痍未復宜如其請遣使往以觀虛實開導其善帝不許無何也先遣騎入塞以報使為辭直與羣臣復請之上疏

言陛下銳意治兵為戰守計然使命不通難保其不為寇宜敕沿邊守臣發兵遊徼有警則入保無事則力耕陛下於機務之暇時召京營總督總兵詢以方略誠接而禮貌之信賞罰以持其後斯戰守可言也帝曰善明年進少傅景帝疾亟直渎等會諸大臣臺諫請復立沂王為皇太子推大學士商輅草疏未上而石亨徐有貞等奪門迎上皇復位殺王文等疏草留姚夔所嘗出以示郎中陸昶嘆曰是疏不及進天也直遂乞休歸直為人方面修髯儀觀甚偉性嚴重

泰和縣志

卷十九

人物

列傳

十五

不苟言笑及與人交恂恂如也在翰林二十餘年稽古代言編纂紀注之事多出其手與金谿王英齊名人稱二王以居地目直曰東王英曰西王直以次當入閣楊士奇不欲也及長吏部益廉慎時初罷廷臣薦舉方面大吏專屬吏部直委任曹郎嚴抑奔競凡御史巡方歸者必令具所屬賢否以備選擢稱得人其子穉為南國子博士考績至部文選郎欲留侍直直不可曰是亂法自我始也為尚書十四年年益高名德日益重帝優禮之免其常朝天順六年卒年八

十四贈太保諡文端稽仕至翰林檢討亦以學行稱

史明

按萬歷志稱直性甘淡薄居第陋隘歸休之日惟杖履自適著有抑菴集長子稽仕為翰林院檢討謙謹至孝以哀毀卒稽子仁官至工部郎中有清慎名仁之孫翥孝友篤學以鄉薦出為莆田教諭應督學聘開館會城八閩士子爭師之陞國子學錄門人私諡曰貞穆歸祔葬於檢討之壙龍洲上歲久墓界蝕於旁冢萬歷五年邑令唐伯元清復

泰和縣志

卷十九

人物

列傳

十六

之題曰雙賢之墓而載事於碑子姓科第甚盛俅思皆其後也

陳一敬循之從叔幼與楊士奇同學於陳海桑謨相善由薦舉為賀縣丞有惠政以直同寮寃坐罪歸

萬歷志

余學夔字一夔珠木人自幼喜學篤於孝弟忠信舉永樂二年進士選為庶吉士預修永樂大典授翰林檢討又預修五經四書性理大全永樂甲辰陞侍講修國史年五十六以疾致仕家居以文字自娛歲賔興廣東聘主考試稱得人卒年七十三有北軒

宏治志

□□身岡下坑八與同郡李昌祺同舉永□□□進□  
洪熙元年布政考滿當給誥命奏父年八十餘願□  
給父帝嘉而許之後遂為例居河南十二年繩豪滑  
去貪殘疏滯舉廢救災恤貧治行與昌祺等明史

按豫章書省身初由庶吉士改刑部主事進郎中  
超擢河南右藩卒時年甫五十萬歷志稱其為人  
溫雅端潔風聲樹於士林

歐陽和字允和蜀江人永樂壬辰進士授北京道監察  
御史寬厚坦亮遇事持風裁文皇巡幸北京仁宗為

泰和縣志

卷十九

人物

列傳

十七

太子監國一時宵小構扇上下惶惑因挺言曰東宮  
吾君之子他日君我者也何可計私匿情有問以實  
對文皇亟稱之曰歐陽御史真識大體者征播有功  
陞雲南副使父觀民年九十五終於家聞訃哀毀馳

歸卒通志

陳循字德遵永樂十三年進士第一授翰林修撰習朝  
廷典故帝幸北京命取秘閣書詣行在遂留侍焉洪  
熙元年進侍講宣德初受命直南宮日承顧問賜第  
王河橋西巡幸未嘗不從進侍講學士正統元年兼

經筵官久之進翰林院學士九年入文淵閣典機務  
初廷議天下吏民建言章奏皆三楊主之至是榮士  
竒已卒循及曹鼐馬愉在內閣禮部援故事請帝以  
楊溥老宜優閒令循等預議明年進戶部右侍郎兼  
學士土木之變人心洶懼循居中所言多採納進戶  
部尚書兼職如故也先犯京師請勅各邊精騎入衛  
馳檄回番以疑敵帝皆從其計景泰二年進少保兼  
文淵閣大學士帝易太子加兼太子太傅進華蓋殿  
大學士兼文淵閣如故英宗復位于謙王文死杖下

泰和縣志

卷十九

人物

列傳

十八

循戍鐵嶺衛循在宣德時御史張楷獻詩忤旨循曰  
彼亦忠愛也遂得釋御史陳祚上疏觸帝怒循婉為  
解得不死景帝朝嘗集古帝王行事名勤政要典上  
之河南河北大雪麥苗死請發帑市麥種給貧民因  
事進言多足採者然久居政地刻躁為士論所薄其  
嚴譴則石亨輩為之非帝意也亨等既敗詔釋為民  
所著有芳洲集

史明

尹崇高塘西人登永樂十三年第為南京監察御史風  
聲赫然嘗按浙江等處貪暴絕跡後以事謫寧國推

官志  
宏治

陳禮字正言柳溪人永樂壬辰進士初釋褐試事都察院上偉其儀擢思南守既至蠻民獷暴弗奉法禮為政先恩惠而後法度蠻民無敢撓首苗普亮作亂禮遣人招之弗順會鎮遠侯率師至禮挾土兵以從普亮就執放其黨民賴以安羊溪苗蠻叛禮遣諭之皆曰吾避前官虐政耳賢太守至願相率以歸郡多荒田租稅以萬計民甚病之禮奏除其額詔從之以外艱去歲餘郡守闕人詔起除臨安府臨安蠻酋恃險

泰和縣志

卷十九

人物

列傳

十九

剽刦禮至單騎往諭皆欵服凡為民辯冤摘伏明決如神故所歷皆有治聲既卒思南臨安皆思之不忘

楊榮撰陳  
臨安墓碑

曾鶴齡字延年一字延之存翁曾孫初與兄椿齡同舉永樂三年鄉試值家貧椿齡先會試登第為吉士鶴齡獨留家授徒養父母又十七年為永樂辛丑始赴會試廷對第一授修撰進侍讀出主考順天鄉試場屋火試卷殘缺有司懼罪不敢請更試鶴齡曰必更試然後滌百弊以昭至公不然雖無私此心亦欺朝

廷矣有司具聞命下悉如所請預修永樂洪熙宣德實錄累官侍講學士以疾卒生平和厚易直好正人以義而亦能受人言雖嫉邪無怨之者教人先行後文率多成就子序蒙簡俱舉進士

康熙志

□□志鶴齡所著有松坡集昭度集其事詳見王

文端所撰墓志中

歐陽哲字廣哲蜀江人永樂辛丑進士由吏部主事擢浙江提學僉事時初設提學哲首被命以行所至鑒別公明大得士心尋丁內艱服除改浙江提刑僉事

泰和縣志

卷十九

人物

列傳

二十

陞河南副使上疏言漕河利害董築張秋建四事詔如其言九年考績至京乞致仕家居十五年足跡不及城府卒年八十有餘

萬歷志

按楊東里集有蜀江歐陽氏族譜序云哲居泰和之蜀江里其先出唐吉州刺史琮因有家於吉琮七世孫曰彪曰彤彤宋文忠修所自出也彤會昌中舉進士官至工部尚書子澤居吉之永和縣澤四世孫曰忠曰憲忠徙萬安之常溪憲乃珣之所自出也常溪七世至德祖徙蜀江迨哲八世又按

人物志載哲歷官四十年以清介著有雪坡集  
陳士啟名雷以字行別字震之永樂二年進士選庶吉  
士擢禮部郎中尚書呂震擠尹昌隆至死屬吏皆憚  
之承奉唯謹士啟獨不少徇永樂十二年吏部言布  
按二司多缺官諸曹郎給事中出為監司者二十餘  
人士啟得山東右叅政盡心吏事不為察察名督徭  
賦不峻期約青州飢疏請賑之粟使至而飢民倍士  
啟復上疏先出粟子民謂使者曰有罪吾獨任廷議  
竟從之坐唐賽兒亂下獄數月釋還職高煦謀不軌

泰和縣志

卷十九

人物

列傳

二十一

士啟密聞於朝煦既執從薛祿張本錄餘黨撫安人  
民事竣命清理山東軍籍宣德六年卒於官

通志

按通志文稱士啟事蹟詳見曾松臞所撰行狀中  
獨不及密啟高煦不軌事

劉咸字士皆博學有行曾著快閣賦傳誦於時登永樂  
進士歷官河南按察僉事陞副使尋改廣東副使時  
繕營北京被命董木料卒於官咸律已廉用法恕巡  
歷郡縣必求忠孝節義可勵俗者表之曰此治化先  
務也文章政事俱有名於時所著有河南詠古集虛

菴集

萬歷志

按東里序咸父名彝字仲良咸迎養不赴於邑南澄江之陰十數里買田築室率少子就耕所耕足歲計外有餘閒釀酒獨酌賦詩為樂泊然無他營廖謨字子謨舉廣東鄉試永樂十三年登第選庶吉士出為長沙潁上二縣陞刑部郎擢福建按察僉事正統中調河間府同知以廉能陞本府知府卒於官民思之子世清名類重義喜施撫孤姪甚厚又施百棺以葬無告者由江寧縣主簿陞本縣丞孫佩以鄉舉

泰和縣志

卷十九

人物

列傳

二十二

官工部員外郎陞廣西知府年方壯遽致仕歸家詩

酒自娛羅整菴為作墓志

萬歷志

按通志作廖謨字文績與此異

尹子源號巖泉存仁孫博學篤行以薦入翰林與修永樂大典書成授福清河泊官廉慎愛民素與楊士奇

王直最友善

宏治志

劉綱字尚紀西廂人永樂中以薦舉歷知興寧通山陽城臨海四縣正統中擢嚴州府通判清操彌勵為按察使軒輓所知保陞本府知府始終一節九年致仕

又同里蕭吉字仲敬與綱同起用任宣城知縣有善

政宏治志

陳永字德清一敬子幼孤能自奮力學宣德中任常州

府學訓導正統初擢河南道御史出按湖廣福建所

至焯著能聲陞浙江按察僉事有平寇功宏治志

彭詡字士揚父原後母劉氏士揚早孤劉賢教育之刻

苦自奮吉安郡學舉士揚訓導赴吏部送翰林考經

義為尚書蹇義所賞識時英國公張輔奏求儒師遂

以士揚應選從英國征交阯凡軍中奏疏檄諭悉出

泰和縣志 卷十九 人物 列傳 二十三

其手英國於事關切要者必與定議還授國子監典

籍為人篤於義負直氣能輔人於道楊東里集

陳孟潔謨孫父果字孔碩雋爽廉重讀書一過目輒了

大義篤於孝友哀慕終身喪祭一用朱子禮不為浮

屠老子之教兄子凱不肖矯父命奪其貲直數十萬

緡悉置不校曰吾豈以是傷同氣哉嘗愛華山之勝

自號太華生蘓伯衡為著傳孟潔以才學擅名登永

樂丙戌進士入翰林為庶吉士楊東里集

歐陽賢字允賢洪武庚午以書經舉鄉試明年會試中

教官歷嚴州興化教授永樂初陞國子助教兼通詩

春秋自祭酒司業以下咸禮重之

楊東里集

泰和縣志

卷十九

人物

列傳

二十四

泰和縣志卷十九

終